

洞真太上飛行羽經九真昇玄上記 內十

一名上清太上迎元九道飛行羽經

太上大道若昔受飛行羽經九真昇玄上記
寶言紫文錄金之字超虛躡空淨景之道於
玉清上官虛皇高真道君於是太上大道君
以其要傳上清玉帝君君以傳上元太素君
太素君又傳太微天帝君君施行真祕以傳
晨中黃景君君以傳皇初靈靈君君以傳中
央黃老君以傳九微太真玉保王金闕上
相大司命高晨師青童太君梵灑使以此文
教授當為真人者也

諸有太素絳錄及金簡刻名皆當得見此文
自非其人不與相遇欲出傳之者必須精應
感激乃付之耳歟盟斷金誓以不宣之信矣
有此經者太素三元君遣玉童二十四人玉
女二十四人侍書之左右糾刺泄慢之愆衛
護有書者身此
太上中真之道也非次第之中也蓋中和之
中真矣配簡三元名刊太素行則紫旄之節
駕則八景錦輿前從萬靈後從千真九鳳齊

肅天鈞唱弦神龍啟道五帝參軒飛行太空
邀宴丹霄位為上清真人玉卿之師

諸有太上飛行羽經昇玄九真者聽三千年
六傳過其人一日頓授之若無可授者三千
年限盡以朱素寫六通封之裁眉山金臺之

室過此不復傳出不可授而傳者泄真人之
道也受而不承科者毀真人之誓也授者經
師受者靈宗焉道書慢犯宣露寶文者七祖
父母詣玄都受風刀之拷身為下鬼幽之夜
河欲受飛行散金為盟欲知仙忌文中為志
既知羽書天地同符子閱玄文超駕慶雲此
之謂也出委羽洞臺刻名

太素三元君有言曰

仙人始知廢庇斗星之道而未知真人藏斗
精之法夫九斗者天樞之正蓋玄輶之華寶
機紐八維總旋九度迴陰圓方運攝和氣理
調陰陽司適無外夫斗星之玄曜二暉為之
夜翳璇璣動用四象為之流墜玄明合煥威
光共蔚矣
太帝君有言曰

仙人徒知咀嚼陰陽吐納二氣而不知斗星
是陰陽之根府二象之玄綱也乃苦辛玩其
波末而不識營始而甚易廢其枝條而失手
根本矣何不心藏九斗陶冶二象耶行之十
四年太上迎以瓊輪超虛躡空上登上清列
為上真反神嬰顏衆神侍軒

青童大君有言曰

仙人徒知璇璣太極煥曜萬長觀九道之流
共玩負動以攝神庇之以來大度用之以求
神仙而猶不識迴九氣以內照藏明斗於泥
丸於是魂凝魄練合德靈煙解其道上昇上
清得其道身為上真是以真人抱大象以匿
霞包斗精以藏身我先師是故左駕綠雲右
總絳晨身昇太素超虛躡空

存斗星紫色其剛赤色覺紫色之蒸溫暖也
存星大小意行之此青童君口訣昔栢成子
谷希子廣成子青真子各存斗星之悉並與
身共入蓮實之中忽見蓮內有千里金池玉
山萬頃宮臺宇室蓋亦連雲朱木結實紫華
生園碧輦玄黃三素八輪奇異之觀不可名

字四子遊遊經時旋宴極勝而反當是之時不覺蓮實之中央也所謂以大枝小變化无蹤此存星之極感闊狹之標致也乃可蒙杪為八海何蓮實之足妙哉

以月一日三日及五日禺中時夜半時唯一時也入室正坐北向接手定氣臨目畢乃存此斗九星來下入頭泥丸中以柄杓前指魁偃向上也良久忽見斗魁中有一大神人衣服名字如祝所言極久頭中當小熱温然也此是上元九精真氣來入故暖異以告驗熱感之休應也方乃嚔液五十過叩齒九通畢舉左手第三指捻兩眉中央於是微祝曰太上紫暉九道之尊華蓋七落迴曜萬晨動御高靈靜和景雲陰陽流灌二炁中分旋濟無外煥朗衆天今月啓牙來登泥丸元精結感化為大神名曰竒紐厥字靈綱正坐中斗遊我明堂鳳羽紫帔虎錦丹裳左帶玉佩右腰金璫手把流鈴頭巾晨光吐炁灑精泥丸以康魂魄凝和植華柱梁使我飛仙超虛躡空上造上清策虎命龍北朝玉帝瓊琳上官

西謂太素稽首三元祝畢又燕津三十過叩齒九通又祝如前畢起北向再拜西向再拜拜畢乃不復臨目事訖矣

諸寢靜之室牀上行之可也拜亦不下地也夫真人作法所貴於安其所安崇妙簡微不復曲折敗常乖乎宿處也要道不煩要領絕倫矣後施三祝之法皆依佈象此行也但祝不同及存星有背向之異耳要言在於密房曲室勿令有見其存思也所以爾者存思時玉童玉女將在側而鑒焉又不可帶喪臨尸經穢滲邪衣被中履一切勿錯越以假借於非類矣何謂類邪同志契者是也非我同好不與同席而坐非我同盟不與同牢而食道俗以殊有崇奉六天及事山川魔神者不居其室不饗其饌勿著其衣勿冠其中蓋避其尸穢之下氣過其邪風之往來也此所謂真道之真道矣精妙之精妙也若能為其妙乃得其真能避其穢乃獲其新若將混沌雜棲臭香

齋器不標其神不整其氣淫貞同牢會庶共位廁邪風而不蕩心履塵壤而不思超邁者以此尋真真為無也夜光不生於龔井下才不植乎標嶺此之謂也精感彷彿靈應機微玉華告驗神光表睥自非爾師勿言之也斗

中大神者蓋九星之精因感變而忽生矣是施行時當心存名字至後祝日止後祝自復有神又存如初若是泥丸中星神恒存居其中每事效此為象存斗星來下今極思不覺忽然已在我形中也初存或未應彷彿但極思念之如已在形中亦足致感久久自漸入妙月七日九日十二日禺中時若夜半時入室正坐接手定氣臨目畢乃存此斗九星來下入心中似柄杓豎仰向喉嚨中向外也良久忽然見魁中有一大神衣服名字如祝所言極久當有覺心中温暖真氣來入也乃嚔津五十過叩齒九通舉右手第三指以捻心於是乃微祝曰太上紫真九氣中靈包括萬度瓊璣煥明飛

霞流暉曜燭玉清玄蓋衆辰陰陽判成四和
交降七緯順生肇月吉辰來映心處流光落
景中元充盈六府啓闢華液派平塊魄制鍊
得真之精感至尊爽德化立成忽見大神坐
安心房整氣朝津百節流通攀斗據魁盼遊
百方其名璣度厥宇素康絳羽華帳龍帶虎
蒙身生寶曜項負圓光首建飛晨扶冠低昂
使我飛仙超浮太空上造紫闕北朝玉皇役
使萬神衆靈奉迎心上生華慶雲永昌鳳嘯
泠泠驚吹銜鏘

靈仰鎮千晨植牙七度用明九煙芬葩制陽
表順執陰以和真暉啓陣玄根總羅肇月惟
吉觀映膺內紫氣發霄飛光縱墜鍊我魂魄
華津紫蔚忽見大神上官靈貴名曰抗萌厥
字流鬱正坐齋中乘斗九氣吐納雲液平血
理胃黃鳳羽懷龍衣虎帶手啓日根頭戴綠
符腰生流火煥電映無使我飛仙超空躡浮
上造玉房攜帶霄虛役使萬神天地同休
祝畢又嚙津三十過叩齒九通又祝如前祝
畢起向本命再拜畢開目行下元之道畢
矣凡舉手有所捨是臨祝之時耳祝畢接手
如初

太上丹靈玄光煥煥九瑋啓璇暉烝溼散紫
晨幽燭七曜蔚繁三景奏明陰陽以判四度
用昌雲津迴灌八節啓炁上昇九元據斗攀
網奉見三神問我稽留何不昇仙我即稽首
畏鬼以前帝乃赫然口銜日根左破六天右
感鄧山流鈴上煥萬魔碎分遂和我魄強我
三魂藏斗內曜九精在心紫霞洞映飛光萬
尋和魂制魄六腑滌練精感變躍玉妃忽見
坐當我心俯視仰盼其名豪華厥宇鄰霄吐
納朱炁和平百關身服錦帔鳳光鸞裙腰帶
虎錄龍章玉文手執月華建以日冠騰躍太
霄駕景蓋雲書名太素我得飛仙超浮空同
乘瓊太元上造朱房役使萬神紀約二度還
反嬰頽北帝激雷南帝火陳東倉啓燭赫赫
雷震西流雙杵鳴音唱鈞四舉超躍薦我玉
真遂乘八景遊宴九煙

祝畢又嚙津三十過叩齒九通復祝如前祝
畢起向西北再拜畢開目行八節之真畢矣
此道是超空之秘妙九真之奇法三改行真
月用九日故謂之九真昇玄文

此太上禁書內寶為真之要訣也若得其人當傳之時受者當清齋百日或三十日或十日任意造其所適矣又當先告齋一日以洗素心授者對齋如受者為付與之日先歛血累壇剪髮立盟為不宣泄之信誓也後聖以歛血犯生氣之傷剪髮違膚毀之犯謹以黃金二鎰代割血之信青系之帛三十二尺當割髮之約師受誓物不得散為私藉以濫用皆當施山棲高隱單侶貧道若超騰步虛或投之於山室散之靈巖所以爾者明天信貴東善測道精感愛育也不奉料約生死七祖父母受玄都風刀之考身為下鬼傳授年限出投節度如上法當謹按之盟物皆精上也啓心肅整坦誠單允靡有不盡也受書則宗也授書則經師也開道則仰範標模求生則存匠生地不遵所奉闕略違慢者三祖獲刑於大官身生業疾軒轅師荆山丈人丈人但解鍊石之道無他妙也豈賢於緡雲哉軒轅曾問其鍊石道故遂師焉荆山丈人是姬幽子也今在委羽山能鍊石成水煎

水成玉粉玉為散以石水服之能知道與天同存然不能飛行虛空手把晨霞也鍊石雖妙固小術耳
右太上飛行羽經九真昇玄上記其道畢矣其下乃是太上九真中經書雖有上下序訣然別法異用不相干也中央黃老君分以傳大虛真人與八道祕言相次九真中經在人間施行亦有口訣本文似祕不書也今請言之
第一真法當以五月五日十五日二十五日二十七日二十九日一月之中五過行之耳皆以平旦
第二真法當以八月八日十一日十四日十九日二十三日二十七日一月之中六過行之耳皆以辰時
第三真法當以六月六日七日十七日十八日二十五日二十六日一月之中六過行之耳皆以巳時
第四真法當以正月二日八日十四日十八日十九日二十八日一月之中六過行之耳

皆以午時
第五真法當以三月三日八日十三日二十日二十六日一月之中五過行之耳皆以未時
第六真法當以七月七日十一日十四日十八日二十三日二十五日二十八日一月之中七過行之耳皆以申時
第七真法當以十一月二日六日九日十三日十六日十九日二十三日二十七日一月之中八過行之耳皆以申時或酉時
第八真法當以二月二日七日九日十五日十八日十九日二十七日一月之中七過行之耳皆以戌時或亥時
第九真法當以十二月三日九日十七日十九日二十六日二十九日一月之中六過行之耳皆以子時
右行九真中經口訣畢矣此月此日皆是合真迴順生悉攝精之時善可以存思易致玄感若高棲絕頂潛標靈巖斷人事於內外割粒食以清腸接手正心合手合晨皆當日施行自如本經今之所書蓋人間多事不得日

日清閑以行之也行之十四年亦起得虛無能死能生出水入火大上登清玉藏生華與天相傾

其昇玄羽經上卷也行之三道一月九日蓋亦人間未及大靜之時若長齋久靜單景獨往仰秀空洞心單事外者皆宜此日行之以次相續也一月九行施於人中耳

八節昇斗中又存思忽見斗中玉妃在我前坐玉妃坐紫煙入我心中良久其衣服如八節所祝此女子是九精之陰靈玉清之上妃也出青童口訣

洞真太上飛行羽經九真昇玄上記

九

十一

洞真太上太霄琅書卷之一

紫微夫人課

左

瓊文帝章

雲務子者蓋元皇玉虛之胤太帝之中子也抱瓊胎於玉房結雲精於金門含日月於紫胞變洪露以凝神鍊胎息以推運任歷劫以轉輪化生於元氏告陽道以成真於是上皇元年三月一日天暉啓晨誕於九玄之上寶耀无量之天觀太陽於雲崖曜金容於瓊軒順皇基於帝圖法玉秀於自然濯以九靈之暉灌以甘香玉泉飲以靈妃皇芝哺以九鍊飛霜神龍翼其側瓊鳳騰其顛紫煙生于上流光鬱于隣二象抗其綱三辰協其真神州歌其妙七轉變其神靈風迅其軀迴香靈其塵蕭蕭太虛之上靡靡同波之濱年冠二九思微念玄通性理運任時推遷不慕皇道遺遙中原遊娛太霄徘徊紫天流盼歷劫得趣忘旋運非我制擬探上仙遂名書帝簡位登太真三元下教贈爵皇篇於時受命朝禮玉天上登九玄之臺大有之宮紫鳳玉京七寶

珠房於明霞之館清齋玉軒靈瑞告感項負圓光夜照神燭自明瓊堂於是虛皇道君於空洞之上玄虛之中以太霄琅書瓊文帝章降授於君是時天先冥遠三晨迴精五宿改度七元運靈九色晃曜煥絡玉清飛煙紫鬱流漫八冥玉陛登階萬帝臨庭飛仙羽蓋輔翼太真仙童玉女各三千人執中散香流芳掃塵於是命駕檄召五靈飛霄迴輪乘空絡煙神鳳挺靈靈妃導仙明皇啓路三道合明流電揚精逸駕九玄遊眇瓊闕宴景三元盤徊玉霄適肆紫晨於是披琅書於无崖誦帝章於碧雲理宿根於玉訣檄威靈於瓊文唱妙曲於空洞精靜念於玉軒理二儀於玄圖掌帝錄於萬仙總地司於五嶽領上真於三閭上統无崖下攝洞源自天以下莫不咸隸於太真神非可測化不可名近難可論遠不可尋清難可滓混難可澄微乎妙哉斯至德之帝靈靈幾乎高尊也

太霄琅書乃九天王飛霄之曲瓊文帝章乃九天之上並以元始之初生於自然空洞之